

جریدہ علیہ

مشیخت جلیلہ اسلامیکہ جریدہ رسمیه سید

غره رمضان المبارک سنہ ۱۳۳۸

عدد ۶۰

اون بش کونده بر نشر اولور

بشخی سنہ

فتاویٰ شریفہ

تأخیر صلاة صبح

یوم نحرده مزدلفه ده نماز قیلان حجاجدن غیریلری صلاة صبحی اعاده قابل اوله جق مرتبه ده آخر وقته تأخیر افضل اولورمی . الجواب اولور .

*
**

عقد

زید آخر دیارده ایکن زوجه سی هند نفسی عمروه تزویج ایلسه عقد مزبور صحیح اولورمی . الجواب اولماز .

*
**

فسخ عقد

هند صغیره یی ولی اقربانی اناسی زینب مهر مثلیله کفوی زیده تزویج ایتد کد نصکره هند بالغه اولوب بعده عقد مزبوره عالمه اولدینی آندہ نفسی اختیار واشهاد ایدوب خیار بلوغله عقد مزبوری زیدک حضورنده حاکمه فسخ ایتدیرمکه قادره اولورمی . الجواب اولور .

*
**

رضاع

زید رضاعاً قزقزداشی هندك نسباً قزی زینبی تزوج ایتمك جائز اولورمی الجواب اولماز .

*
**

طلاق

اوقیوب یازمق بیلمیان زید آخر دیاره کیدوب عمروه زوجهم هندی بوشادیغمی خبر ویرمك ایچون طرفدن مکتوب یازدیوب عمرو مکتوبده هنده خطاباً اوچ طلاق بوش اول دیو یازوب زیدك مهریله مهرلیوب هنده کوندرد کدنصکره زید واقف اولدقده بر طلاق تحریرینه امرینی اقرار ایدوب اوچ طلاق تحریرینه امرینی انکار ایتدکده وجه محرر اوزره امری ثابت اولسه طلاق اخیر اولیوب هندك عدتی منقضیه اولمقله زید هندی رضاسیله بلاحله تزوجه قادر اولورمی الجواب اولور .

*
**

دعوی صلحه طلاق

هندك زوجی زید هندك باباسی عمرو ایله ماله متعلقه دعواسندن صلح اولدقده زید عمروه سند و قزکده علاقه م یوقدر دیوب لکن طلاق نیت ایلماسه بویله دیمکله هند بوش اولورمی الجواب اولماز

*
**

حضانه

هند زوج مطلق زیددن اولان صغیره قزی زینبك حق حضانه سندن حضور قاضیده وازکچوب قاضی بونکله حکم ایتد کدنصکره نادمه اولسه هند زینبی زیددن آلب استغنا حاصل اولنجه یه قدر امساکه قادره اولورمی الجواب اولور .

*
**

هند صغیره یی خاله سی زینب بحق الحضانه امساك اوزره ایکن هند طقوز یاشی تکمیل ایدوب مشتهاه اولسه هندك باباسی زید هندی زینب دن آلمغه قادر اولورمی الجواب اولور .

*
**

نقّه

هند فقيره محتاجه اولوب آناسنك آناسی زينب موسرەدن غیری كمسنه سی اولماسه
نقّه هند زينب اوزرينه لازمه اولورمی الجواب اولور .

*
**

زوجی اوليان هند فقيره نك باباسنك لابوين خلی زيد موسردن غیری كمسنه سی
اولماسه هندك نقّه سی زيد اوزرينه لازمه اولورمی الجواب اولور .

*
**

نقّه طلبی

زيد آخر دياره كيتد كدنصكره زوجه سی هند تقدير قاضی یا تراضی یوغیكن برمدت
كندی ماليله كچنسه زيد كلد كده هند مدت مزبورده ایچون زیددن نقّه بهانامه نسنه آلفه
قادره اولورمی الجواب اولماز .

*
**

سقى بستان

برنهردن ایكى قریه اهالیسی بستان وباغچه لرینی سقى ایدمكلوب وضع قدیم اويله ایكن
اول قریه لردن برینك اهالیسی قریه اخری اهالیسنه بعدالیوم بزمستقلاً سقى ایدرز دیوب
وضع قدیمی تغییره قادر اولورلرمی الجواب اولمازلر

*
**

ترکه دن اجرت خدمت طلبی

اجرت ایله خدمت ایدر مقوله سنندن اولان هند اجرت قولنسز زينبك طلبيله برمدت
زينبه خدمت ایتد كدنصكره اجر مثلی آلدین زينب فوت اولسه هند خدمتتك اجر
مثلی زينبك ترکه وافیه سنی قبض ایدن ورثه سنندن آلفه قادرده اولورمی الجواب اولور .

*
**

كسیده معاونت

زيد باباسی عمروك عیالنده ایكن عمروه كار وكسبنده معاونت ایدوب بر مقدار

مال حاصل اولسه زید اول مالده عمروه مشارکته قادر اولورمی الجواب اولماز .

*
* *

میراث

زید متوفانک زوجه سی هند و اوغلاری عمرو و بکرفوت اولوب قنغیسی مقدم فوت اولدیغنی معلوم اولمسه مزبورلردن هریری آخره وارث اولیوب هریرینک مالی ورثه اخیاسنه ویرملک لازم اولورمی الجواب اولور .

*
* *

میراث مقتول

زید فوت اولوب لابوین قزقنداشی هندی و لابوین عمی اوغلی عمروی ترک ایتدکده عمرو ترک زیددن حصه سنی آلق مراد ایلسه هند عمروه مجرد سنک باباک بنم بابامی قتل ایتمکله سکا حصه دکمز دیوب ویرمامکه قادره اولورمی الجواب اولماز .

*
* *

زید مسام فوت اولدقده اناسی هند مرتدین ترک ایلسه هند زیده وارثه اولورمی الجواب اولماز .

*
* *

میراث متوفین معاً

زید و عمرو معاً فوت اولوب هریری آنالرینک لابوین عمی بکرك اوغلی بشری و بکرك قزی هندی ترک ایتدکده ترک زید و عمرو اوچ سهمدن اولوب ایکی سهمی بشره برسههی هنده ویرلسه صحیح اولورمی الجواب اولور .

کتابه الفقیر

دری زاده السید عبدالله

عفی عنهما

*
* *

تصحیح :

جریده علییه نك (۵۸) نجی نسخه سنک اوچنجی صحیفه سنک برنجی فتواسنده ترتیب سهوی اوله رق واقع اولان « اقامت ایده جکئی بیایرسه مسافر اولورمی » یزینه « اقامت ایده جکئی بیلدزسه » اوله قدر .

